

ՄՅՈՒՋԱՆՆԱ ԳՐԻԳՈՐՅԱՆ

ԳԱԱ Արվեստի ինստիտուտի հայցորդ,
ՀՊՄՀ արվեստի պատմության,
տեսության և մշակութաբանության ամբիոն
ՀՏԴ 745/749

**ԽՃԱՆԿԱՐԴՈՒԹՅԱՆ ԶԱՐԳԱՑՄԱՆ ԸՆԹԱՑՔԸ
/Նախաքրիստոնեական շրջան/**

Բանալի բառեր և արտահայտություններ. արվեստ, խճանկարչություն, դեկորատիվ հարդարանք, հելլենիստական, դիցաբանական, պեղումներ:

Ключевые слова и выражения: искусство, мозаики, декоративный орнамент, эллинистической, мифологические, раскопки.

Key words and expressions: arts, mosaics, decorative ornament, Hellenistic, mythological, excavations.

Խճանկարը դեկորատիվ-կիրառական արվեստի և գեղանկարչության հնագույն ձևերից է: Նկարչության այս ճյուղը գերազանցապես մոնումենտալ և գեղազարդող բնույթ է կրում: Հնագույն մոնումենտալ խճանկարներ հայտնաբերվել են հեթանոսական մեհյաններում, քրիստոնեական եկեղեցիներում, հանրային ու պետական կարևոր շինություններում՝ հատակներին և պատերին:

Խճանկարը որպես տարածքի ձևավորման արվեստ, առաջին անգամ կիրառվել է Միջագետքում՝ մ.թ.ա. IV հազարամյակում: Հնագույն նմուշներ, որոնք լրացրել են շինության ճարտարապետական ամբողջությունը, երևան են եկել 1928 թվականի հին շումերական քաղաքների՝ Ուրուկի և Ուրի տարածքում հայտնաբերված տաճարի (մ.թ.ա. III հազարամյակ) պատերին և կիսապուրակներին: Շումերները խճանկարը օգտագործել են և՛ ֆունկցիոնալ, և՛ էսթետիկ նպատակներով: Ուր քաղաքի պեղումների ժամանակ անգլիացի Լիոնարդ Վուլլիի (1880-1960) կողմից հայտնաբերվել է պալմանականորեն «Շտանդարտներ. պատերազմի և խաղաղություն» (մ.թ.ա. 2600-2400 թթ., 21,59x49,53 սմ, Լոնդոն, Բրիտանական թանգարան) անվանումը ստացած նմուշը¹:

¹ В.Струве, Древнейшие государства в Двуречье (Всемирная История), том 1, М., 1956, стр. 192-193.

Խճանկարը լայնորեն կիրառվել է նաև Եգիպտոսում: Դրա վառ օրինակն է Թուֆենհամոնի գահը² (մոտ մ.թ.ա. 1325, 102x54x60 սմ., Կահիրե, Եգիպտական թանգարան), որի վրա ապակուց, էմալից և թանկարժեք քարերից հավաքված է Թուֆանհամոնի և նրա կնոջ կյանքից մի տեսարան, իսկ գլխավերևում գլխավոր աստված Աթոնն է՝ արևի սկավառակի տեսքով:

Կատարման տեխնիկայից և որոշ գեղարվեստական առանձնահատկություններից ելնելով՝ դասական խճանկարը բաժանվում է երեք տեսակի: Դրանք կարելի է դիտարկել անտիկ՝ հունահռոմեական, խճանկարչական արվեստի զարգացման հետ զուգակցելով:

Հատակի խճանկարչությունը, հավաքված գույնզգույն գետաքարերից (голыш) և վառ կարմիր գույնի լավ թրծված խեցուց, հռոմեացիների կողմից անվանակոչվել է *Opus barbaricum*: Այն անտիկ խճանկարի հնագույն տեսակներից է, որը կիրառվել է մ.թ.ա. V-II դարերի հատակները պատկերազարդելու նպատակով: *Opus barbaricum* տեխնիկայով կատարված հատակներ հայտնաբերվել են Օլինֆ քաղաքում և Մակեդոնիայի անտիկ տներում (մ.թ.ա. V դարավերջ և IV դարի առաջին կես):

Խճանկարային արվեստի, նրա տեխնիկայի զարգացման և կատարելագործման ընթացքում ստեղծվում է *Opus tessellatum* տեխնիկան: Այն մեծ տարածում է ստանում մ.թ.ա. IV-I դարերի Հռոմեական կայսրության արվեստում, հետագայում՝ Արևմտյան Եվրոպայի երկրներում: Անգամ Դիոկղետիանոս կայսեր օրոք (224-311) խճանկարով զարդարված հատակների համար մրցանակներ են սահմանել:

Ի տարբերություն գեղանկարիչների, խճանկարիչները իրենց աշխատանքները չքին ստորագրում, թերևս այդ է պատճառը, որ եզակի անուններ են մեզ հասել: Հռոմեացի գրող Պլինիոս Ավագը (մ.թ. 23-79) նշում է նկարիչ Պերգամոնյան Սոսայի (մ.թ.ա. 250-150) մասին, որն այն եզակի խճանկարիչներից է, ում անունը պահպանվել է: Գրողը նրան ներկայացնում է որպես «Չհավաքված տունը» (հուն. թարգ.՝ Asarotos oikos) խճանկարի հեղինակ³: Թեև այդ աշխատանքը չի պահպանվել, բայց մեզ են հասել կրկնօրինակները⁴: Այն հատակին է, որում պատկերված են

² В.Кондрашов, Цивилизационные миры традиционных обществ Востока (История мировой культуры), Ростов на Дону, 2002, стр.46.

³ Гай Плиний Старший. Естественная история ископаемых тел (пер. и прим. В. Севергина), СПб., 1819, стр. 249.

⁴ Մեզ հասած կրկնօրինակներից պահվում են Բորդոյի թանգարանում, Թունիսում (III դար): Այս թեման հատակից դեպի առաստաղ տեղափոխվեց IV դարում (Սբ Կոստանցիա, Հռոմ):

խնջույքից հետո մնացած ուտելիքներ՝ ձկներ, մրգեր և այլն⁵։ Այստեղ առավել արտահայտվում է պատրանքային տարրը։ Խճանկարչի այլ աշխատանքներից է «Աղավնիները սափորին» պատկերը (Ադրիանայի վիլլա, Տիվոլի)⁶, ուր թեպետ աղավնիները ներկայացված են հուզականորեն, բայց դրա հետ մեկտեղ շատ ռեալիստական են⁷։

Հասարակական և պետական շինությունների զարդարման համար խճանկարների օգտագործման աճը պատճառ հանդիսացավ առավել կատարյալ *Opus vermiculatum* տեխնիկայի առաջացման համար։

Եթե խճանկարի պատրաստման երկու առաջին տեսակները համեմատաբար բարդ չեն, ապա *Opus vermiculatum* տեխնիկային տիրապետումը, միաժամանակ՝ նոր նյութերի ներգրավումը և կատարման տեխնիկական եղանակների կատարելագործումը, անտիկ խճանկարիչներին հնարավորություն ընձեռնեց ստեղծել հատակի խճանկարչության առաջադեմ, բարձրարվեստ նմուշներ⁸։

Այդ տեխնիկայով է հավաքվել 1916 թվականին Դուրբետում (Ալբանիա) հայտնաբերված, մ.թ.ա. IV դարին թվագրվող «Դուրբետի գեղեցկությունը» (Տիրանա, Ալբանիայի ազգային պատմության թանգարան) անվանումը կրող խճանկարը։ Այն անտիկ արվեստի հիմնալի նմուշ է, որի մեջ հեղինիստական արվեստը զուգորդվում է տեղական ավանդույթներին։ Ոճական առումով նման է Մակեդոնիայի հնագույն մայրաքաղաք Պելլայում պեղված խճանկարին («Առյուծի որսը», մ.թ.ա. IV դարի վերջ, 1,64x3,37 մ, Դիոնիսոսի տուն), որին հատուկ են վաղ հեղինիստական արվեստի մի շարք գծեր՝ կերպարների զգացմունքայնությունը, կոմպոզիցիայի դինամիկան, լարվածությունը և ողբերգականությունը։

Opus vermiculatum տեխնիկայով է պատրաստված Պոմպեյում՝ Ֆավնի տանը, 1831 թվականին պեղված, մ.թ.ա. I դարին պատկանող «Իսոսի ճակատամարտը» կամ «Ալեքսանդր Մակեդոնացու ճակատամարտը Դարեհ III-ի հետ» խճանկարը⁹ (2,72x5,13 մ, Նիապոլ, Ազգային

⁵ Տե՛ս Ե.Ермолаева, Об одной древнегреческой пародии и античных мозаиках в стиле «неприбранный пол», СПб, 2015, стр. 69-76.

⁶ Աշխատանքը պեղվել է 1737 թվականին և պահվում է Հռոմի Կապիտոլիումի թանգարանում։ Ջուր խմող աղավնիների պատկերներ կան նաև Պոմպեյի որմնանկարներում։

⁷ А.Виннер, Материалы и техника мозаичной живописи, М. 1953, стр. 17-18.

⁸ А.Ларионов, Искусство античной напольной мозаики, СПб, 2014, стр. 8.

⁹ Այն համանուն նկարի խճանկար տարբերակն է։ Նկարի հեղինակը Ֆիլոկսենն է։ Տե՛ս և այս մասին М.Доброклонски, А.Чубовой, История искусства зарубежных стран, М., 1979, стр. 145.

հնագիտական թանգարան)¹⁰: Դա հռոմեական ամենահայտնի խճանկարներից է, ուր ներկայացված է մ.թ.ա. 333 թ. Իսոսի մոտ Ալեքսանդր Մակեդոնացու և Դարեհ III Կոդոմանի միջև տեղի ունեցած ճակատամարտը:

Հետագա դարերի ստեղծագործությունների համար, մասնավորապես՝ մ.թ.ա. III-I դդ., բացի թվարկված նյութերից, խճանկարային շարվածքի մեջ սկսեցին օգտագործել նաև գունավոր սմալտա, որի պատրաստման մեջ հմտացել էին անտիկ ապակեգործության վարպետները: Սմալտայի գունապնակը, որը կազմված է թափանցիկ, կիսաթափանցիկ և խուլ տեսակներից, տարբերվում է գուներանգի խայտաբղետությամբ:

Այս դարաշրջաններին թվագրվող հռոմեական խճանկարչական արվեստի գնահատելի նմուշներ են պահպանվել Սիցիլիայում, վերջիններից է «Վիլլա դելա Կասելլե»-ինը¹¹ (III-IV):

I-V դարերին թվագրվող Անտիոքի խճանկարներն առանձնանում են կոմպոզիցիոն կառուցվածքով, հարուստ գունատոնային լուծումներով, նուրբ լուսաստվերային անցումներով: Այստեղ չկան արյունալի տեսարաններ, ինչպիսիք Հյուսիսային Աֆրիկայում, պատվիրատուները նախընտրում էին դասականությունը, գեղեցիկ հերոսներին, ռոմանտիկական տրամադրությունները: Խճանկարներում առկա գործողությունները զարգանում են անշտապ, շարժումները նուրբ են, պահպանված են դասական գեղեցկության ընկալումները. խոշոր աչքեր, ճշգրիտ դիմագծեր: Հիմնականում պատկերվում էին հունական աստվածները, դիցաբանական պյուժեները («Եվրոպայի առևանգումը» (II դար, Բեյրութ, Ազգային թանգարան), Հերմեսը փոքրիկ Դիոնիսի հետ (IV դար, Անտիոք)): Մեծ տարածում ուներ նաև ծովային աստվածության պատկերումը՝ Օվկիանի և Ֆետիսի միջոցով: Նրանց դասական կերպարները կարող ենք տեսնել «Օրացույցների (սեզոններ) տանը»:

Ամփոփելով վերը շարադրվածը՝ նշենք, որ անցնելով դարերի միջով՝ խճանկարչությունը ունեցել է և՛ վերելքներ, և՛ վայրէջքներ: Պահպանված և մեզ հասած նմուշները փաստում են, որ այն օգտագործվել է ոչ միայն

¹⁰ Սկզբնապես աշխատանքը հավաքված էր գետնի վրա, սակայն 1913 թ. առավել լավ տեսանելի դարձնելու համար մասնագետներն այն ամրացրեցին պատին: 2005 թ. Պոմպեյում, Ֆավին տանը, որտեղ սկզբնապես գտնվել է խճանկարը, հավաքվեց և տեղադրվեց կրկնօրինակը:

¹¹ 2013 թ. օգոստոս 15-ին ՅՈՒՆԵՍԿՕ-ի կողմից ճանաչվել են, որպես համաշխարհային ժառանգություն:

արտաքին միջավայրը գեղեցկացնելու, այլ նաև որպես ժամանակաշրջանի գաղափարախոսությունների պատկերավորման վաղ արտահայտչամիջոց:

Ս. Գրիգորյան

**Խճանկարչության զարգացման ընթացքը
/նախաքրիստոնեական շրջան/
Ամփոփում**

Խճանկարը դեկորատիվ-կիրառական արվեստի և գեղանկարչության հնագույն ձևերից է: Խճանկարը՝ որպես տարածքի ձևավորման արվեստ, առաջին անգամ կիրառվել է Միջագետքում՝ մ.թ.ա. IV հազարամյակում: Շումերները խճանկարը օգտագործել են և՛ ֆունկցիոնալ, և՛ էսթետիկ նպատակներով:

Կատարման տեխնիկայից և որոշ գեղարվեստական առանձնահատկություններից ելնելով՝ դասական խճանկարը բաժանվում է երեք տեսակի. *Opus barbaricum*, *Opus tessellatum* և *Opus vermiculatum*: Վերջիններս դիտարկվում են անտիկ՝ հունահռոմեական, խճանկարչական արվեստի զարգացման հետ զուգակցելով:

С. Григорян

Резюме

Мозаичная одна из старейших области декоративно-прикладного искусства и живописи. Мозаика как искусство дизайна пространства, впервые использовалас в Месопотамии /IV тысячелетие до н.э./. Шумеры использовали мозаику как функциональных, так и эстетических целей.

Учитавая некоторые методики и художественные особенности, классическая мозаика делится на три типа. *Opus barbaricum*, *Opus tessellatum* и *Opus vermiculatum*.

S. Grigoryan

Summary

Mosaic is one of the oldest area of decorative arts and painting. Mosaic art design as a space for the first time used in Mesopotamia / IV of the millennium BC /. The Sumerians used a mosaic of both functional and aesthetic purposes.

Uchitavaya some techniques and artistic features, classic mosaic is divided into three types. *Opus barbaricum*, *Opus tessellatum* and *Opus vermiculatum*.